

astro

AWANI

Kempen pemuliharaan penyu UMT dapat pengiktirafan MBOR

Bernama

23/05/2024 04:30 MYT



Universiti Malaysia Terengganu (UMT) mencipta sejarah apabila kempen pemuliharaan penyu yang dijalankan sekumpulan pelajarnya mendapat pengiktirafan Malaysia Book of Records (MBOR). - Foto Facebook UMT

KUALA NERUS: Universiti Malaysia Terengganu (UMT) mencipta sejarah apabila kempen pemuliharaan penyu yang dijalankan sekumpulan pelajarnya mendapat pengiktirafan Malaysia Book of Records (MBOR).

Menerusi kempen itu, sebanyak 10,000 cap tapak tangan daripada warga UMT dan komuniti setempat dikumpulkan di atas kanvas bersaiz mega sepanjang 19 meter dan 15 meter lebar dalam tempoh 24 jam sebagai tanda sokongan terhadap usaha UMT.

Pengarah projek, K. Easwary berkata, pelbagai kempen telah dijalankan dalam menyebarkan maklumat berkaitan pemuliharaan penyu dan alam sekitar, namun masih gagal mengubah gaya hidup serta pemikiran masyarakat untuk lebih peka terhadap aspek pengurusan sampah dan sisa buangan yang menjadi ancaman kepada khazanah alam.

Justeru, bagi memupuk dan menerapkan kesedaran dalam masyarakat, beliau bersama beberapa pelajar mengambil inisiatif menjalankan kempen dengan mengumpul cap tapak tangan berwarna pada kanvas putih sebagai simbolik ikrar agar dapat bersama-sama menjaga alam semula jadi daripada terus dicemari.

"Program berkenaan disiarkan secara langsung menerusi media sosial rasmi UMT semalam.

"Kami amat berbangga kerana kempen ini mendapat pengiktirafan sebagai 'Biggest Palm Print Banner' oleh MBOR. Terima kasih atas kerjasama baik daripada warga UMT dan penduduk setempat," katanya dalam kenyataan pada Rabu.

Easwary berkata, beliau akan terus mengadakan kempen pada masa akan datang bagi mendidik masyarakat terutama golongan muda yang menjadi pewaris khazanah alam negara. - BERNAMA